


ANG BINHI DILI

MAHIMONG MANUNUNOD

NGA UBAN ANG TIPAKA

 Salamat kaayo, Igsoong Demos. Ug karon malipayon kita nga maania dinhi karong buntaga, ug madungog ang tanan niining maayo nga mga testimonyo sa niining buutan nga mga tawo, ug karon nagasalig kita nga padayong magauban kanato ang Dios ug magapanalangin kanato.

² Karon, unyang gabii, nasayod ko nga magawali ako unyang gabii, kon itugot sa Ginoo. Ug giestorya ko si Igsoong Shakarian, kaganina lang, ingon ko, “Karon, ayaw’g kaulaw. Kabalo ko nga kinahanglan natong mogawas dinhi sa alas onse ug makalimot baya ako—ako og oras pagnakatindog na ako dinhi.”

³ Daw sa ang tanan kanato ingon-niana usab. Mabati nato. . . Moingon sila, “Duha ka minuto, tulo ka minuto na lang, o. . .” Igsoong Smith, kabalo na mo, malisud kanang buhaton sulod sa duha o tulo ka minuto. Ug kabalo ko kung unsa kana, ug naluooy ako sa tanan. Apan ania man gud kita sa kapanahonan sa oras, kon diin kita karon. Paadto kita ngadto sa Eternidad, apan ania pa kita karon sa kapanahonan sa oras.

⁴ Ug ingon ko, “Igsoong Demos, paghapit na nga kinahanglan ko nang moundang, ayaw’g kaulaw, kuhita lang ko sa akong amerikana ug mahibaló na ko nga oras na kana para mohunong.” Karon, kung dili man nako mahuman, humanon ko ra unyang gabii. Ug kung mahuman ko man, bueno, aduna na pud ko’y usa ka bag-ong teksto para unyang gabii.

⁵ Karon sa dili pa nato ablihan ang Basahon, makigsulti una kita sa Tagsulat, samtang nakaduko ang atong mga ulo.

⁶ Minahal nga Langitnong Amahan, ginapasalamatan Ikaw namo niining buntaga para sa niini nga panagtigum, og para sa mga nadungog na namo. Kung amo lamang pahanugotan ang panalangin karon, Ginoo, mabati gyud namo nga pagkamaanindot nga maania dinhi. Busa nagaampo ako nga Imong ipapadayon, kung kini man maayo sa Imong pananaw, ug padayon Ka nga magauban kanamo ug magtabang kanamo. Ug karon nagakatigum kami palibot sa Pulong. Samtang nagakatigum kami sa pagpakig-fellowship sa usa’g usa, nga madungog ang mga testimonyo bahin sa kung unsay gibuhát Mo para kanamo, karon tugoti kami nga balikan ang Pulong ug hibaloon kung asa nagagikan ang tanan niini. Dayon,

mamahimo kanang usa ka pagpamatuod bahin sa kung unsay ginabati namo ug nangakita, nga nagakahitabo karong adlaw. Itugot kini nga mga butang sa Ngalan ni Jesus. Amen.

⁷ Karon, ingon—ingon nga Iyang alagad, ako—obligado ako para sa usa ka Mensahe. Ug usahay wala gayud ako mahisabti, sa nangaging mga panahon, ug tingali'g pirmi na gyud. Apan wala man ko nagasulti og mga butang aron—aron lang nga mamahimong lahi, ginasulti ko kini nga mga butang aron nga magmatinuuron. Ug gusto ko gayud nga isulti kung unsay hunahuna ko nga husto. Ang tanan aduna og—og katungod sa niana nga mga butang, ang pagpahayag sa kaugalingon niyang opinyon. Mao kana'y hinungdan kon nganong anaa ako sa inyong taliwala.

⁸ Ug si Igsoong Shakarian, nagahisgot mahitungod sa mga prayer kard diha sa mga linya sa pagpaampo, ingon nga nakita niya kung unsa nga ang Balaang Espiritu. . . Karon, wala niya gisulti nga ako kado. Ang Balaang Espiritu kadto, tungod kay dili ko man mahimo kanang mga butanga. Nahibalo gyud ang si kinsa man, nga wala gyud ako'y mahimo. Apan—apan gamay ra kana nga bahin, sa kung unsay nangakita ninyo dinhi. Kinahanglan matan-aw ninyo ang uban pa nga bahin, ug makita kung ginaunsa Niya pagpropesiya sa mga butang! Ug ako. . . sa mga butang nga magakahitabo, kini'y, kini gayud ang. . . kamo, kamo ang nagapahimo nga mahitabo kana. Kamo mismo ang nagatoo sa Dios.

⁹ Ug—ug dayon kung dili ninyo toohan ang Dios, hinumdumi, isulti Niya kana kaninyo, dinhi mismo sa entablado. Ug kung anaa kamo sa kasal-anan, ingon niana usab ang isulti Niya kaninyo. Ug sa mga butang nga inyong nabuhat, ug nga dili unta angay nga buhaton, sultihan Niya kamo sa ingon. Dili sa kung unsa lang ang ginabutang nila sa prayer kard. Mahimo nilang ibutang sa ilang prayer kard. . . Dili nila isulti, dinha, nga usa sila ka “makasasala,” ug kini nga babaye “nakigpuyo sa dili niya bana,” o uban pa. Ug dili gayud nila ibutang kana sa prayer kard, apan mahibaloan kana sa Balaang Espiritu bisan usاون, kita n'yo. Kita n'yo? Ug busa ingon-niana na kana kaniadto pa og bisan sa karon (kung unsa gayud) ang—ang supernatural niini nga bahin, mga higala.

¹⁰ Ug ginasulti ko kini nga may pagtahud. Tungod kay, dili man daghan kanato ang ania dinhi karong buntaga, usa ra ka gamay'ng pundok. Nagakahibulong ako, hangtud nga manerbiyos na ako og ayo, nga mora og gusto kong mosiyagit usahay. Ug sa diha nga nagalingkod ako didto sa usa ka dapit, sa kilid sa bukid, kon diin nagagahin ako og hataas nga panahon didto, nagadawat gikan sa Dios, monaug ug ihatag ngadto sa mga tawo kung unsa ma'y gihatag Niya kanako. Ug ako—ayaw kong mamahimong lahi sa mga tawo. Apan bisan pa man, aron

mahimong matinuuron, kinahanglan kong magmatinuuron sa Dios, kita n'yo, para—para sa usa ka Mensahe.

¹¹ Ug karon kami'y, kon itugot sa Ginoo, hapit na kaming mobiya alang sa usa ka pagbiyahe ngadto sa gawas-sa-nasud, sulod sa pipila na lang ka adlaw, ug kung kana ma'y kabubut-on sa Ginoo. Mao nga ginahangyo ko gayud ang inyong mga pag-ampo.

¹² Buutan kaayo kamo! Pagmakaestorya gani ko, malimtan ko na hinoon ang oras, sama sa uban pa kanato. Apan para kang Igsoong Shakarian, ang mga ministro dinhi sa entablado, ug dinha sa gawas, kamong tanan nga mga higala kang Jesus Cristo, ginaabi-abi ko kamo diha sa Iyang Ngalan; ingon nga usa—usa ka masigkabanay diha kaninyo, pinaagi sa krus, diha sa Dios, ingon nga mga igsoong lalaki ug mga igsoong babaye.

¹³ Gusto kong moabli, karong buntaga, sa Kasulatan, dinha sa Basahon sa Mga Taga-Galacia, kon itugot sa Ginoo. Buut ko nga mobasa og usa ka Kasulatan.

¹⁴ Karon, sa miaging gabii, nadungog nato ang mensahe nga gipahayag sa nangalagad natong igsoon dinhi sa entablado, nakasulti siya sa laing mga dila. Si Bredesen, Igsoong Bredesen, usa ka buutan kaayong tawo. Ako . . .

¹⁵ Kung tan-awon kini nga ginahunahuna ang akong kawalay-kahibalo ug edukasyon, ang akong kakulang og pagsabut sa mga pulong, ug dayon ingon nga nahibalo na sa Mensahe nga mao'y tinuod, ug makita ang ingon-niana nga mga kalalaken-an sama niadtong pundok sa mga magwawali sa miaging gabii, nga atua didto, ug mga tawong takus nga matawag nga mga intelektuwal. Mahimong dili nila mabuhat kung unsa ang ginapabuhat sa Ginoo kanako. Mahimong dili ko usab mabuhat kung unsa ma'y ginapabuhat sa Ginoo kanila. Apan pag magkauban kita nga nagapamuhat, sigurado ako nga maihatud gayud nato ang Mensahe, kung magpabilin lang gayud kita diha sa Dios.

¹⁶ Ug sa paghatag niya og usa—usa ka testimonyo dinhi niadtong miaging gabii. Ug nakigsulti ang Balaang Espiritu sa laing mga dila, ug, usa kini ka tawo dinha sa mga mananambong, nasayod ako kanunay nga tahuron gayud kana. Tungod, nasabtan ko man, pinaagi sa Biblia, nga kana mao ang Espiritu sa Dios nga nagahatud kanato og usa ka butang. Ug nagsulti siya, naghigot siya mahitungod sa ulahing ulan, nahaunang ulan ug ulahing ulan. Ug nagpahunahuna kadto kanako.

¹⁷ Ingon nga bag-ohay lang ako nga gihatagan ni Igsoong Bonham og usa ka gamay'ng sobre nga may pipila ka mga tseke niini, miingon, "Usa kini ka gugmang halad para sa . . . gikan sa mga tawo." Karon, siya—siya, wala na nila unta buhata kana. Kita n'yo, wala baya ko mianhi dinhi para sa niana nga katuyoan. Apan ako . . . siya, gihatag man nila kadto

kanako, ug, siyempre, mahimong adunay...wala na'y paagi nga ibalik kadto. Ug gamiton ko kana, kung itugot sa Ginoo, ug paningkamotan nga igahin kana sa akong mga panggasto, sa mga pagbiyahe sa gawas-sa-nasud. Tungod kay, wala ma'y nagapangabaga kanako, sa unsa mang paagi, kung asa ako magaadto.

¹⁸ Medyo sekreto ra kini, tungod kay dili man ko pasudlon sa mga kasimbahanan. Ug magaadto ako ingon nga usa ka mangangayam, tungod kay anaa na kini sa akong Ginoo. Gipahimutang na sa Ginoo sa akong kasingkasing nga buhaton gayud kini, ug kinahanglan kong moadto didto nga medyo magpadisgayis. Kita n'yo? Aduna man gud sila og gamay'ng kataw-anan nga mga ideya didto, nga gusto sa matag usa nga mopirma ako sa usa ka kard, nga ginayonan kono nako sila sa kung unsay ilang ginatoohan, ug ingnon nga kining *uban* kono nga pundok sayup, ug miingon *kining* usa pa ka grupo nga pasudlon kono ko nila kung moingon lang ko nga sayup *kini* nga pundok. Kita n'yo? Apan dili ko gusto ang ingon-niana. Kita n'yo, kita'y...

¹⁹ Kanunay kong gipaningkamotan nga mobarug tali sa mga tawo, nga gawas sa mga organisasyon ug sa ilang mga panagkalahi, ug magtawag sama sa gisulti sa Espiritu sa Dios pinaagi sa mga kaigsoonan dinhi niining buntaga, nga dili kita usa ka denominasyon. Mga anak kita sa usa ka pamilya. Karon, walay denominasyon nga Branham. Adunay usa ka Branham nga pamilya, ug dili kita nagapamiyembro niana nga pamilya, gipanganak kita diha niana nga pamilya. Ug busa, ako, ingon niana ang ginapaningkamotan ko nga irepresentar, sa—sa pinakamaayong nahibaloon ko kung unsaon.

²⁰ Karon diha sa Mga Taga-Galacia 4:27-31, nagtoo ko nga gimarkahan ko na dinhi, gusto kong basahon kini para sa usa ka teksto.

Kay nahisulat kini, Maglipay ka, ikaw nga apuli nga wala mag-anak; tumiyabaw ug suminggit ka, ikaw nga wala manganak: kay ang gibiyaan adunay...labi pang daghan og mga anak kay kaniya nga adunay bana.

Karon kita, mga igsoon, sama kang Isaac, mga anak sa saad.

Apan ingon kaniadto nga siya nga gipanganak sumala sa unod naglutos kaniya nga gipanganak sumala sa Espiritu, mao man usab kini karon.

Apan unsa ba'y giingon sa kasulatan? Isalikway ang babayeng-ulipon ug ang iyang anak: kay ang anak sa babayeng-ulipon dili makapanunod uban sa anak sa babayeng may kagawasan.

Busa, mga igsoon, kita dili mga anak sa babayeng-ulipon, kondili sa babayeng may kagawasan.

Hinaut nga igadugang sa Ginoo ang Iyang mga panalangin karon para sa Iyang bililhon nga Pulong.

²¹ Aduna ko'y pipila, nga nailista na nga pipila ka butang kagabii; ug kaniadto, pag aduna ko'y usa ra ka panagtigum sa usa ka semana, sa kung asa man, ako—matiman-an ko pa ang mga Kasulatan nga ingon ka tataw sa akong hunahuna. Apan karon pagkahuman nga ako. . . Karon, sama sa pagsulti sa patawa nga paagi, dili ko usab ginatuyo nga magpakatawa dinhi niining entablado. Apan pagkahuman nga milagpas na ko og baynte-singko, sa makaduhang higayon, dili na ako makahinumdom sama kaniadto. Daghan nang. . . Daghan nang mga milya ang nabiyahe sa niining karaan na nga ford, ug mao nga dili ko na matiman-an kini. Apan samtang makalihok pa ako, gusto kong ihalad ang matag lihok ko para sa kahimayaan Kaniya Nga nagluwas kanako.

²² Karon akong, pagkakita ko niining buntaga, paglantaw ko. . . Tingali'g talagsaon kini, ug tingali para sa usa ka intelektuwal nga panghunahuna makapalibog gyud kini, apan pag-uyon lang kini para sa butang nga gitawag ako. Bisan ang matag gamay'ng butang usa ka ilhanan para kanako. Ginabantayan ko Kini, ginatan-aw kung giunsa Niini paglihok. Sa ingon-niana ko ginakuha ang akong mensahe usahay, ang himatikdan ug tan-awon ang paglihok sa Espiritu, ug tan-awon kung unsa ang ginaingon *niining* usa, og ang ginaingon *nianang* usa.

²³ Ug namatikdan na ninyo ako, sa makadaghang higayon, sa dili pa ang usa ka panerbisyo sa pagpang-ayo, nga nagatindog dinha sa entablado, o kaha nagalingkod sa luyo, nga may ginalantaw. Mabati ko gayud ang Espiritu, sa paagi nga nagapanglihok Kini, ug mahibaloan ko na kung unsa ang problema nianang tawo nga nagalingkod dinha. Kita n'yo? Makita ko dinha, *dinhi* dapit, kita n'yo, mahibaloan mo na Kini bisan sa dili ka pa moadto sa entablado.

²⁴ Usahay sa dili pa ako moadto sa usa ka panagtigum, usahay, bisan sa wala pa ako mianhi dinhi sa California, naglingkod ako kuyog sa mga kauban ko, moingon, "Adunay usa ka pihong butang ang mahitabo, mahitabo ang *ingon-niini* dinhi, ug *kini* mapaingon dinhi, og kini usab mopaingon sa *niining* direksyon," kita n'yo, tungod kay anaa kini sa Espiritu sa Dios. Siya ang. . . Hingsayran Niya ang tanang butang gikan sa sinugdanan pa lang, kita n'yo, ug busa Siya gayud ang Maong Eternal.

²⁵ Ug dayon nahimatikdan ko, karong buntaga, si Igsoong Jewel Rose, usa gayud ka bililhon nga higala ug igsoon natong tanan, kung unsa nga mitindog siya ug gibasa kanang Mga Salmo. Tan-awa kung daw sa unsa nga nagkatakdo kana, sama sa gisulti niya, "Gusto kong makita kung unsa nga matang sa binhi ang anaa diha kaninyo." Kagabii, nakigsulti ang Espiritu

ug miingon, ug mahitungod kini sa, “Ulahing ulan, ang una ug ulahing ulan, nga parehong gibubo sa kaulahiang mga adlaw.” Ug karong buntaga, “Ang binhi nga anaa diha kaninyo.” Tan-awa n’yo, ang Espiritu kini nga nagapakigsulti, matikdi kung giunsa Niini pagpamulong pinaagi niining mga ministro, ug uban pa, karong buntaga. Ug busa hisgotan ko kini nga hilisgotanan: *Ang Binhi Dili Mahimong Manununod Nga Uban Ang Tipaka*.

²⁶ Usa kana ka talagsaon kaayo nga teksto, apan, *Ang Binhi Dili Mahimong Manununod Nga Uban Ang Tipaka*. Ug sa paghisgot niini, kuhaon ko ang akong konklusyon mahitungod niini, o sa akong teksto, diay, gikan sa Mga Taga-Galacia 4:27, tulo kini, siyempre nagahisgot si Pablo dinhi mahitungod sa literal nga binhi sa duha ka anak ni Abraham. Karon, kini, gusto kong gamiton kini aron makasigurado nga dili ninyo kini mapalagpas. Ug kung molapas man ko sa oras, ipadayon ko kini unyang gabii. Ug gusto kong magtudlo, sama sa usa ka leksyon nga pang-Sunday school, aron nga kamo, nagtoo ko, magkaaduna og usa ka mas maayo nga pagsabut.

²⁷ Ug ako...Ug ang pipila kaninyo nga mga kalalaken-an nga—nga mas may kasarang sa paghimo niini kay kanako, aba...Dili ako usa ka teologo, sa unsa mang paagi. Ug busa kung dili man mo mouyon kanako bahin Niini, buhata na lang ang sama sa gibuhat ko bahin sa gisulti ko kagabii sa diha nga ang usa ka minahal nga igsoong babaye dinhi nagluto para kanako og usa ka cherry pie. Nagalingkod ako didto sa akong—akong...sa akong lawak sa hotel kaganinang buntag, ako—nakausap ko og liso, apan padayon ko lang nga ginakaon ang maong pie. Giluwa ko lang ang liso, nakita n’yo. Busa, ingon niana usab, kung unsa ang dili ninyo ginatoohan mahitungod Niini, iluwa lang, kita n’yo, ug padayon lang nga kaonon kung unsa ang sa hunahuna ninyo nga husto.

²⁸ Karon, gihisgotan ni Pablo ang mahitungod sa duha ka anak ni Abraham, nga, ang usa kanila mao’y pinaagi ni Sarah ug ang usa pa mao’y pinaagi ni Hagar. Karon nahibaloan nato dinhi, ug nasabtan nato kana pinaagi sa mga Kasulatan, nga ang Dios dili gayud girepresentar sa duruha. Pirmi gayud kini sa tulo. Kanunay nang sa tutulo, nga nagakahingpit ang Dios.

²⁹ Ang matematika sa Biblia nagapadayon gayud nga hingpit. Nagakahingpit ang Dios sa tutulo, gisimba diha sa pito, ug uban pa. Kita n’yo, busa atong—atong makita nga ang matematika sa Biblia dili gyud nagakapakyas.

³⁰ Ug aduna kita dinhi og duha ka anak ni Abraham, ug bisan pa man mahimo lamang kita nga mga manununod basta nga usa kita sa niana nga mga anak, o sa usa ka anak ni Abraham. “Kay kita ingon nga mga patay na diha kang Cristo, kung ingon-niana nahimo kitang mga binhi ni Abraham, ug mga manununod uban

Kaniya sumala sa saad,” busa kinahanglan nga adunay usa pa ka Anak si Abraham.

³¹ Karon, hingsayran nato nga ang iyang unang anak mao’y pinaagi ni Hagar, ug hingsayran pud nato nga ang iyang ikaduhang anak mao’y pinaagi—pinaagi ni Sarah. Apan aduna pa siya og ikatulo nga Anak, nga mao si Jesus. Karon, daw sa kahibulongan kana, apan mao kana ang paningkamotan natong ipatin-aw. Sa gikaingon ko na, ginarepresentar sa Dios ang Iyang Kaugalingon, kanunay sa kahingpitan, sa tutulo. Ug gipaklaro ko na ang akong kaugalingon sa tanan karon, ug ilabina kaninyo nga teolo- . . . nga mga teologo, nga kining mga butanga mao’y sa paagi lamang nga nakita ko Kini, sa paagi nga miabot Kini kanako.

³² Sama sa sinugdanan, ang Dios, nagpuyo kaniadto ang Dios nga nag-inusara, tungod nga Siya man ang Maong Eternal, kita n’yo, dili pa gani Dios kaniadto. Ang *Dios* mao’y usa ka “butang nga silimbahon.” Ug ang Logos, sama sa tawag nato Niini, ang Pulong nga migula gikan sa Dios, Kana, nasayod ang si kinsa man nga Kana mao ang Manulonda sa Ginoo, o ang Pulong sa Ginoo, nga nagasunod kaniadto sa mga Israelinhon latas sa kamingawan; ang Manulonda sa Pakigsaad, ang Logos nga migula gikan sa Dios. Ug dayon nahimong unod kana nga Logos ug nagpuyo ipon kanato. Karon ania kita sa San Juan 1, “Sa sinugdán mao na ang Pulong, ang Pulong kauban sa Dios, ug ang Dios mao ang Pulong.” Ug karon, ingon nga gihatag Niya ang Iyang kinabuhi para kanato, pagkahuman nagabalik ang Iyang Espiritu nganhi kanato. Miingon si Jesus, “Niadto unyang adlawa kamo makaila nga Ako anaa sa Amahan, ang Amahan ania Kanako; Ako anaa kaninyo, ug kamo ania Kanako.”

³³ Kita n’yo, Kini mao ang Dios, sa kanunay, ginapadayag sa Dios ang Iyang Kaugalingon, Siya Mismo nga nagapamuhat sa nagkalainlaing mga kapanahonan. Busa kanang tulo, nga, Amahan, Anak, ug Espiritu Santo, ang mao ra nga Dios nga nagapamuhat sa tulo ka mga kinaiyahan. Ug kita sa karon usa ra, ang Iglesia Mismo, nga usa ka kinaiyahan sa panghunahuna sa Dios sa wala pa ang pagkatukod sa kalibutan, aron magkaaduna og usa—usa ka Iglesia. Busa kadtong mga anaa kang Cristo anaa na daan diha kang Cristo sa sinugdanan pa lang, nga mao ang Iyang mga hunahuna, ug ang Iyang mga hunahuna mao man ang Iyang mga kinaiyahan.

³⁴ Dinhi nagsugod ang maong binhi, sa saad. Ug medyo nagduhaduha si Abraham dinhi, pinaagi ni Ismael. Ug buut ko nga ipakita kaninyo ang tulo ka ang-ang niini, sa niining Binhi nga atong pagahisgotan, nga dili manununod kauban sa tipaka. Karon nahibaloan nato, dinhi sa sinugdanan, nga gihatag sa Dios kang Abraham ang maong saad.

35 Gihatag Niya kang Adan ang saad, una. Ug kadto mao ang, o, ang pakigsaad nga adunay mga kondisyon. “Kung dili mo buhaton *kini*. Kung buhaton mo *Kini*.”

36 Apan sa diha nga gihatag Niya kini kang Abraham, wala kini’y kondisyon, “Gibuhat Ko na *kini*.” Wala gayud Niya. . . Ang gibuhat Niya, wala kadto og kondisyon, sa paghatag Niya kang Abraham. Karon, ug pinaagi niana, si Abraham nga nakabaton sa saad, busa kinahanglan nato nga mamahimong Binhi ni Abraham. “Dili lamang *kini* para kang Abraham, kondili para sa iyang Binhi nga nagsunod kaniya.” Karon kung mahimatikdan ninyo, dili *kini* “mga binhi” nga managsunod kaniya, kondili “Binhi” nga sunod kaniya.

37 Karon nahibaloan nato nga ang maong saad, ingon nga medyo giduhaduhaan ni Sarah, ug mao nga giingnan ni Sarah si Abraham nga kuhaon kining si Hagar, ang taga-Egipto, nga batan-ong babaye, para mahimong asawa, ug kana ang mamahimong paagi kono nga ipatungha sa Dios kining gikasaad nga binhi.

38 Karon, nakita n’yo, sa gikaingon ko na kagabii, ang unsa mang pag-irog gikan sa orihinal nga plano sa Dios magahatud lang sa tibuok butang ngadto sa walay kahanayan. Dili kita puedeng moirog gikan nianang orihinal nga Pulong. Kinahanglan *kini*. . . Gihisgotan na nato kini kagabii, o sa miaging gabii, diay, bahin kang Balaam. Nabatonan na niya ang tubag sa Dios, nga tukma ug klaro, “Ayaw pag-adtto!” Apan aduna pud ang Dios og pahanugot nga kabubut-on. Ug mahimo kamong mamuhat basi dinha kung gusto ninyo, ug himoon *kini* sa Dios nga mapasidunggan Niya sa gihapon ang Iyang Kaugalingon, apan dili gihapon kana mao’y hingpit nga kabubut-on sa Dios. Ug mao kana ang kinahanglan natong paningkamotan, ang Iyang hingpit nga kabubut-on, dili ang Iyang pahanugot nga kabubut-on. Ang Gingharian sa Dios, nga Iyang. . . anaa sa yuta karong panahona, mahimong. . . nga dili gayud mahimong maihan-ay, og tarung, diha sa usa ka pahanugot lang nga kabubut-on. Kinahanglan nga mahibalik *kini* ngadto sa Iyang hingpit nga kabubut-on.

39 Karon nakita nato dinhi nga si Sarah, human nga gisulti sa Dios kang Abraham nga matawo ang maong bata pinaagi ni Sarah, nga mao’y magpanalangin sa kalibutan, karon giduhaduhaan kadto ni Sarah. Gusto ko nga himatikdan ninyo, dili *kini* naggikan kang Abraham; kondili kang Sarah, ang babaye. Ug giduhaduhaan niya kadto, ug miingon siya, “Kuhaa si Hagar.” Ug dili unta gusto ni Abraham nga buhaton kadto, apan giingnan man siya sa Dios nga moadtto ug buhaton kadto bisan pa man. Busa gibuhat niya kadto, nga medyo nagduhaduha. Karon, si Isaac, ingon nga mao’y gawasnon ug gikan sa gikasaad nga babaye, dili mahimong manunhod uban ni Ismael, nga gikan sa babayeng-ulipon, diha sa pagduhaduha.

40 Mao kana ang gipaningkamotan nga isulti ni Pablo dinhi. Kita n'yo, pagduhaduhaan ang usa ka butang, ug ginababagan niini ang usa ka pihong butang sa Dios, usa ka pihong sugo sa Dios, apan dili gayud kini mahimong manununod uban sa orihinal nga sugo sa Dios. Nasabtan n'yo ba? Kita n'yo, dili kini mahimong manununod.

41 Karon mao kana'y hinungdan kon nganong kusganon akong nagasulti karong adlaw. Ug nahunahunaan ko nga usa kini ka maayo nga higayon, tungod nga wala ko kahibalo kung unsa pa ka dugay kitang magkauban, ug, siguro mahimo ko, nga sa unsa mang paagi tabangan ako sa Dios nga ipakita kaninyo ang hinungdan kon nganong hugot gayud ang pagsaway ko sa giorganisa nga relihiyon. Kita n'yo? Kita n'yo, dili kini mahimong manununod uban sa orihinal nga programa sa Dios, tungod kay ang organisasyon dili kini iya sa Dios. Iya kini sa tawo. Ang unang iglesia nga sukad naorganisa, sa tibuok kalibutan, mao ang iglesiang Romano Katoliko didto sa Nicaea, Roma. Ang Pinadayag 17, miingon, "Usa siya ka bigaon, ug ang tanan niyang mga anak mga bigaon." Ug ang usa ka bigaon mao'y babayeng nagakinabuhi nga dili-matinuuron sa iyang bana, ug mao man gihapon ang anak sa usa ka bigaon. Apan, nakita n'yo, nahimo kining usa ka iglesia, bisan pa man. Usa kini ka giorganisa nga sistema ug ginapahimulag niini ang pagkamanagsoon. Gipanguhaan natong organisahon ang tanang mga kaiglesiahan. Dili kini magpulos; dili gayud magpulos. Dili kini (dili gayud) magpulos. Ang World Council of Churches, sila gayu'y . . . sila'y nahigawas sa programa sa Dios.

42 Karon moingon kamo, "Kinsa ka man, usa ka tawong nagatindog dinha nga wala man lang gani og edukasyon sa unsa mang tulonghaan sa gramatika?" Wala kana nagahatag og kalainan, kung unsa man ang iniskwelahan mo. Dili ang akong iniskwelahan ang ginapaninguhaan kong hisgotan.

43 Ang Pulong kini sa Dios ang akong ginahisgotan, kita n'yo. Ug kining mga kapanghimatuuran nga nakita ninyo sa ministerio, dili kini ako, ang Dios kini nga nagapaningkamot nga ipasabot kaninyo, nga Kamatuoran kini. Magkaaduna ba og unsa man nga kahilambigitan ang Dios sa bakak? Kung ingon-niana ipahilayo unta kini kanako, nga mangalagad sa usa ka Dios nga magapanalangin og bakak. Kamatuoran ang Iyang ginapanalanginan, ang Kamatuoran maoy Iyang ginapasidunggan.

44 Karon, dili mahimong manununod si Ismael uban ni Isaac, tungod kay ang usa medyo nagduhaduha man, medyo nagduhaduha lang. Usa kini ka anak, kini'y binhi gihapon ni Abraham, apan dili ang hingpit nga paagi sa Dios para niini; si Ismael. Karon mahimo kong mohatag og taas nga panahon dinhi, apan nagalaum ako nga ipasabot kini sa Balaang Espiritu

nganha kaninyo sa paagi nga maipasabot gyud kini. Karon kung sila . . .

⁴⁵ Kung dili mahimong magkauban nga manununod si Ismael ug si Isaac tungod kay gipulihan man ang orihinal nga plano sa Dios sa—sa usa ka pahanugot lang nga plano sa Dios, usa ka pahanugot nga pamaagi nga gipanalanginan usab sa Dios, dili usab mamahimong manununod ang espirituwal nga Iglesia sa karon uban sa denominasyonhon. Ang mga denominasyonhon, gipanalanginan man sila sa Dios, sama sa gibuhat Niya kang Ismael, apan ang Espirituwal dili gayud mahimong manununod kauban ang uban pa. Husto kana. Adunay, manggawas gikan sa denominasyon nga iglesia (iglesia kono, iglesiang natural), manggawas gikan dinha ang usa ka Pangasaw-onon ni Cristo, ang mga Pinili.

⁴⁶ Karon kadto, ang nagapaguol kanako niining taknaa, maoy mahibaloan nga makita na nato ang tanan niining mga denominasyon nga nahidangat na niini nga hingsayran nato nga mamahimong . . . nga ginatawag ninyo nga ulahing ulan, o, ang pagbubo sa Espiritu. Nahunahunaan ba ninyo nga miingon si Jesus, nga, “Pagmahitabo na kana, mao na kana ang katapusan”? Sa dihang, dili gayud magkauban nga manununod ang buangbuang nga dalaga ug ang maalam nga dalaga. Kay sa diha nga . . . Ang buangbuang nga dalaga, usa man siya ka ulay, wala lang siya og Lana. Apan sa dihang miadto na siya aron mopalit og Lana, mao pud kadtong higayona nga miabot na ang Pamanhonon. Ug gibiyaan siya, samtang nagapaninguha siya nga makapalit og Lana. Nasabtan n’yo ba? [Nagaingon ang kongregasyon, “Amen.”—Ed.] Gusto kong ipatuhop kana, gayud. Karon, siguradong dili na ako mohisgot pa og dugang nianang hilisgotan. Karon, dili mahimong magkauban nga manununod ang Espirituwal ug ang natural.

⁴⁷ Mao kana kon ngano nga ang Pagsakgaw, ang Pangasaw-onon, ang maalam nga dalaga, ang mga tinawag-pagawas, ang mga gitagana-nang-daan, ang mga pinili! Aba, kamong mga negosyante wala ninyo ginadumala ang inyong opisina nga sama sa ginahunahuna sa ubang mga tawo nga ginadumala sa Dios ang Iyang programa, nga nagapanaghap lang. Hingsayran na sa Dios, sa wala pa ang pagkatukod sa kalibutan, kung kinsa ang maluwas ug kung kinsa ang dili maluwas. Pinaagi og predestinasyon, pinaagi sa pagkahibalo-nang-daan, nakita na Niya ang matag miyembro, og gisulat ang matag ngalan nila diha sa Basahon sa Kinabuhì sa Cordero, sa wala pa gani magsugod ang Iglesia. Mianhi si Jesus aron pangitaon ug luwason kadtong mga anaa na sa niana nga Basahon. Gipalit Niya ang Basahon sa Katubsan. Nawala Kini, ug gitubos Niya kita, ug gitubos usab ang tanan nga mga ngalan nga anaa sa niana nga Basahon sa diha nga gitubos Niya kita.

48 Dayon, sama sa gikaingon ko na sa makadaghang higayon, nailhan ninyo kana. Mao kana’y hinungdan kon nganong ania kamo niining buntaga, kon ngano nga nanggawas kamo gikan sa tanan niining mga organisasyon ug ingon-niana nga mga butang. Kamo’y. . . Aduna gyu’y Butang nga nagabira kaninyo. Sama sa akong panghunahuna, mahitungod sa agila nga napiso nga gilumluman sa himongaan, kita n’yo, naamgo ninyo—ninyo nga aduna gyu’y butang nga lahi. Ang—ang iglesia wala gayu’y usa—usa ka butang nga makapatagbaw. Apan, kamo, nakadungog kamo og butang nga lahi nga usa ka singgit, og naamgo ninyo kini, nga natawo diay kamo para Niini. Kabahin kamo Niini. Kamo, mihaum kamo Niini, sama sa usa ka guwantes diha sa kamot. Mao kana’y hinungdan kon nganong nagkatigum kita dinhi niining buntaga, tungod kay, sumala sa ginaingon kaniadto sa tigulang kong inahan nga taga-habagatan, “ang mga langgam nga managsamang balahibo managkuyog sa pagpanglupad,” tungod nga aduna man kamo’y pagkaparehas.

49 Walay unsa man nga pagkaparehas ang mga buitre ug mga salampati. Managlahi ang ilang pagkaon, bisan pa nga mahimo rang mapiso ang salampati ilalum sa usa ka buitre. Husto kana. Nagadepende ra kung unsa man kana, sa sugod pa lang. Karon, ug tungod niana, bisan pa, ang—ang salampati mahimo rang amumahon sa hamubong panahon pinaagi niana, pinaagi nianang buitre, apan sa katapusan makaplagan ra niya ang iyang kauban.

50 Ingon niana usab ang ginabuhat sa Iglesia sa karon, kay si Jesus man ang Pulong ug Siya mao ang Pamanhonon, ug ang Pangasaw-onon kabahin man sa Pamanhonon. Busa ang Pulong nga mamatuman niining panahona mao ra pud nga bahin sa Pulong nga natuman kaniadto sa Iyang panahon, ug mao ra kini nga Pulong, mao ra nga kasinatian, mao ra nga Kinabuhi.

51 Kay, sa kaniadtong gihimulag sa Dios si Adan, siya’y managsama ra. Nahibaloan nato, nga si Adan kaniadto espiritu, sa sugod pa lang. “Gibuhat Niya ang tawo diha sa Iyang Kaugalingong dagway, gilalang Niya ang lalaki ug babaye.” Ug dayon, sa Genesis 2 ug sunod pa, giporma Niya ang tawo sa. . . gikan sa abog sa yuta. Gilalang ang tawo diha sa dagway sa Dios (Ang Dios Espiritu), busa siya’y usa ka tawong espiritu. Dayon sa nahimo na siya nga tawong unod, unod nga mananap sa ibabaw sa yuta, Iyang—Iyang ginapakita, ginahulagway dinhi ang Pangasaw-onon. Wala na Siya nagkuha ug nagbuhat og usa pa ka linalang, kondili mikuha Siya og bahin nga anaa ni Adan, ang orihinal nga binuhat, mikuha gikan kaniya, og usa ka gusok gikan sa iyang kilid; ug gikuha ang pangbabaye nga espiritu gikan kang Adan, og gibilin ang panglalaki nga espiritu niana, ug gipahimutang pud kadtong ang pangbabaye nga bahin. Busa, kadto’y bahin sa iyang espiritu, bahin sa iyang lawas; unod sa iyang unod, bukog sa iyang bukog; Pulong sa Iyang Pulong,

Kinabuhi sa Iyang Kinabuhi, ug ingon niana ang Pangasaw-onon nganha kang Cristo!

⁵² Mao kana kon ngano nga kinahanglan nga moabot una ang Pagsakgaw sa harianong Binhi. Ug ang uban sa mga nangamatay dili sila mabuhi sulod sa usa ka libo ka tuig, pagkahuman pagadad-on sila ngadto sa Paghukom diha sa Maputi nga Trono. Kita n'yo, wala na'y paghukom para sa harianong Binhi, o sa predestinadong Binhi ni Abraham. Karon kung inyong kuhaon ang San Juan 5:24, paminawa kini, "Siya nga nagapatalinghug sa Akong Pulong, ug nagatoo Kaniya nga nagsugo Kanako, may Kinabuhi nga walay katapusan."

⁵³ Karon unsa ba gayud ang nakapalahi niana gikan sa daghan natong mga teolohiya? Karon mahimo kong mogawas dinhi ug moingon sa usa ka tawong hubog, "Nagatoo ka ba?" "Oo!" Sa usa ka lalaki nga kauban ang asawa sa ubang lalaki, "Nagatoo ka ba?" "Oo!" "Mitambong ka ba sa panagtigum kagabii, aron magpatalinghug sa Pulong?" "Oo!" "Nagatoo ka ba Niini?" "Oo!" Ginasulti lang niya kana.

⁵⁴ Apan ang orihinal nga interpretasyon sa niini nga Pulong, "siya nga *nakasabot* sa Akong Pulong, ug nagatoo Kaniya nga nagsugo Kanako." "Siya nga nakasabot," kana mao'y, kang kinsa Kini nahipadayag.

⁵⁵ Miingon si Jesus, "Walay tawong makahimo sa pag-ari Kanako gawas kon pagadanihon siya sa Akong Amahan. Ug ang tanan nga gikahatag Kanako sa Akong Amahan, magaari sila. Ang Akong mga karnero, ang Akong mga salampati, nagapatalinghug sa Akong Tingog. Sa usa ka dumuloong dili sila monunot." Ug unsa ba ang Tingog sa Dios? Mao ang Pulong sa Dios. Unsa ba ang tingog ni kinsa man nga tawo kondili ang iyang pulong? Ang Pulong kini sa Dios; patalinghugan nila ang Pulong sa Dios.

⁵⁶ Busa ang natural nga binhi usa lamang ka tigdala, pinaagi ni Ismael una, ikaduha si Isaac, dayon hangtud na sa mismong Binhi. Sama ra sa lindog, uhay, ug tipaka, sa mais. Karon, dinhi, ginapakita kanato sa tulo ka ang-ang sa binhi ang tinuod nga hulagway nga gusto ko nga himatikdan ninyo uban kanako niining buntaga. Makita nato dinhi.

⁵⁷ Ug ingon nga dili-edukado, kinahanglan kong ipananglitan ang natural nga mga butang nga akong nangakita, aron itipo sa espirituwal nga mga butang nga gipahayag nganhi kanako, tungod dili ko man mahimong maipasabot kini kaninyo sa unsa mang gramatika.

⁵⁸ Ug, bisan pa man, kanunay gayud nga ginatipo sa Dios ang espirituwal pinaagi sa natural. Kung wala ma'y Biblia, mahibaloan ko gihapon nga husto ang Cristianismo, tungod kay ang tibuok kalibutan nagatuyok man sa kamatayon, paglubong,

ug pagkabanhaw. Nagapatungha ang kinaiyahan og kamatayon, paglubong, ug pagkabanhaw.

⁵⁹ Tan-awa ninyo ang tagok gikan sa kahoy, kung giunsa niini pagpatungha ang dahon, ug ang bunga, inig-tinglagas; nagabalik sa yuta sa pagpangandam para sa mabugnaw nga tingtugnaw, mitago ilalum sa yuta; motungha na usab inig-tingpamulak, nga may bag-ong kinabuhi. Matag tuig, nagapamatuod nga adunay kinabuhi, adunay kamatayon, og adunay pagkabanhaw.

⁶⁰ Nagasubang ang adlaw sa kabuntagon, usa ka gamay'ng bata nga bag-ohay lang gipanganak, mahuyang pa kaayo. Pagka alas-siete o alas-otso, sugod na kining moeskwela. Sa alas-dies o alas-onse, mograduwar na kini sa kolehiyo. Nagasidlak kini diha sa pagkakusgan niini, gikan sa mga alas-onse hangtud sa mga alas-tres, dayon sugod na kining nagakaluya. Inig kagabii mosalop na kini, nga nagakaluya na, usa na ka tigulang nga tawo. Mao na ba kana ang katapusan niini, pagkamatay niini? Dili. Nagasubang kini pag-usab sa pagkasunod buntag. Kita n'yo?

⁶¹ Ang tibuok kinaiyahan, ang imong tinuod og matuod nga Biblia nga nagapamatuod niini nga Biblia! Ug mao kana ang gipaningkamotan ko nga ipakita kaninyo niining buntaga, nga pinaagi sa kinaiyahan makita ninyo ang Pulong sa Dios, nakasubay sa—sa Pulong sa Dios, tungod kay ang Dios man ang nagporma sa kinaiyahan.

⁶² Sama sa siyensiya, nahibaloan nila ang mekanika ug ang mga balaod sa kinaiyahan, apan wala nila mahibalo-i kung unsa kana nga kinaiyahan. Wala nila mahibalo-i ang Kinabuhi sa kinaiyahan. Ang Dios kana. Busa, wala gayud og kapuslanan ang mekanika nga walay dinamika.

⁶³ Karon, ang lindog, uhay, ug ang tipaka, himatikdi ninyo. Nagrepresentar si Hagar dinhi sa lindog, nga mao ang unang kinabuhi nga misugod sa saad. Nagrepresentar pud si Sarah sa uhay, o sa pollen, nga nagagikan sa uhay. Si Maria, nga putli, ang nagrepresentar ug nagpatungha sa tinuod nga espirituwal nga Binhi, aron sa pagpagawas sa tinuod ug matuod nga lindog. Si Hagar ug si Sarah, mao'y parehong pinaagi sa pakighilawas. Apan si Maria, nga putli, maoy pinaagi sa gahum sa gisaad nga Pulong sa Dios, pinaagi sa ulay nga pagkahimugso. Gipanganak niya ang matuod nga Binhi. Ang lindog, nga si Hagar, ang ikaduhang asawa, pinaagi sa pagduhaduha sa saad, namuhat pinaagi sa pagduhaduha, og diyutay.

⁶⁴ Nagalaum gyud ako, nga tabangan unta kita sa Dios. Dili ako . . . Gusto kong makita ninyo kini, gayud. Dili ninyo puedeng duhaduhaan og diyutay ang bisan unsa man Niini. Kinahanglan ninyong dawaton Kini sama sa kung unsa gayud Kini. Wala na Kini magkinahanglan pa og paghubad. Miingon ang Biblia

nga, “Ang Pulong sa Dios walay unsa man nga kinaugalingong paghubad.” Wala magkinahanglan ang Dios sa bisan unsa man sa atong mga tulonghaan aron hubaron ang Iyang Pulong. Pag ginapanghimatud-an na Niya Kini ug ginahimo Kini nga buhi, mao na kana ang interpretasyon Niini. Sa dihang miingon ang Dios, “Motungha ang kahayag,” nagkaaduna og kahayag. Dili na kana kinahanglan nga hubaron pa. Sa dihang miingon Siya, “Usa ka ulay ang manamkon,” og nanamkon ang maong babaye. Dili na kini kinahanglan nga hubaron pa.

⁶⁵ Wala kita nagkinahanglan sa tanan niini, niining mga seminaryo ug ingon-niana nga mga butang nga nagapahimo sa mga tawo, “Bueno, aduna *kanamo* ang interpretasyon. Aduna *kanamo* ang interpretasyon.”

⁶⁶ Ang Dios Mismo ang nagahubad sa Kaugalingon Niyang Pulong. Wala Siya magkinahanglan kang bisan kinsa aron magahubad para Kaniya. Miingon Siya, “Mahitabo kini,” ug mahitabo gayud kini. Ingon Siya, “Sa kaulahiing mga adlaw, igabubo Niya ang Iyang Espiritu,” gibuhat Niya kini. Dili ko igsapayan kung unsa ma’y isulti sa mga denominasyon. Gibuhat gayud niya kini, bisan pa man, ‘kay gisulti man Niya nga pagabuhaton Niya kini. Busa, wala na Kini magkinahanglan og paghubad, kay ang Dios na ang nagahimo sa Kaugalingon Niyang paghubad.

⁶⁷ Ug kining mga butang nga inyong nangakita, nga daw sa kahibulongan pa kaninyo karon. Kung mahimo ninyo, mahinumduman ninyo; ang inyong ministerio, kamong mga Pentecostal, didto kaniadtong traynta o kuwarenta na ka tuig ang milabay, ingon niini kaniadto ka makahibulongan ngadto sa—sa iglesia sa Methodist ug Baptist, nga sama pud Niini kaninyo karon adlaw. Apan karon susiha Kini diha sa Pulong. Gipaningkamotan ko nga ipakita kini kaninyo sama sa inyong pagpaningkamot kaniadto nga ipakita kanila. Ug dayon kung molingi ang Dios ug moingon nga Kini mao gayud, diha sa Pulong, dayon panghimatud-an Kini nga mao gayud, nan mao na kana ang Kaugalingon nga paghubad sa Dios. Dili na kamo magkinahanglan kang kinsa man nga maghubad pa para kaninyo.

⁶⁸ Karon, si Hagar, tungod sa “diyutay lang”! Hinumdumi, dili kamo puedeng magtaktak og usa man ka Pulong gikan Dinha. Ug miingon si Jesus, sa Pinadayag, sa paghinapos sa maong Basahon. Ug sa pinakauna sa Basahon, miingon si Cristo, “Ang si kinsa mang tawo nga magtaktak og usa Kabuok gikan niana nga Pulong!” Usa lamang ka Pulong nga gisayup pagpasabot, ang nagpahinungdan sa matag balatian, kamatayon, nga nagkaaduna kita sukad. Bueno, kung ang Dios, Nga balaan, motan-aw sa ubos; ug gipahiagum ang tanan niini nga kagubot tungod lang sa diyutay’ng sayup nga pagpasabot sa usa ka Pulong, ug ang unsa mang gamay’ng butang nga

batok sa maong labing-hataas nga Pulong ang nagpahinungdan sa tanan niining kagubot; ug pag-antus, pagbubo og dugo ug pagpinal sa Kaugalingon Niyang Anak, aron nga ipasig-uli kining makalilisang nga butang pabalik Kaniya; unsaon nato sa pagpakasulod nga may kulang man ang pagtuman sa tibuok Pulong?

⁶⁹ “Bueno,” moingon mo, “Igsoong Branham, sa Genesis man kana.” Nabati ko kana, kita n’yo.

⁷⁰ Apan sultihan ko kamo, sa Pinadayag, kana ang ulahing bahin sa Libro. “Ang kinsa man nga magataktak og usa ka Pulong gikan sa Basahon niining propesiya, o magadugang og usa ka pulong ngadto Niini, pagataktakon ang iyang bahin gikan sa Basahon sa Kinabuhi.”

⁷¹ Miingon usab si Jesus, diha sa tunga-tunga sa maong Libro! Anaa na usab ang inyong tulo ka mga saksi: Ang Genesis, ang Bag-ong Tugon, ug kini nga adlaw karon. Miingon si Jesus, “Ang tawo dili mabuhi sa tinapay lamang, kondili sa matag Pulong nga nagagula sa baba sa Dios.”

“Bueno, dili man ingon-niana ang pasabot Niya.”

⁷² Nagpakigsulti Siya kaniadto sa mga tawo nga mga teologo, ngadto sa pinakalabaw. Ngani kadto nga mga sacerdote, ang ilang kaapo-apo-apo-apo-apohan mga sacerdote pud kaniadto pa. Usa lang ka sayup nga Pulong ang pagpasabot Niini, aba, nangahulogan na kadto og silot nga kamatayon. Kinahanglan na silang batohon, tungod sa usa ra ka Pulong nga mapakyas. Apan nasayup gayud sila sa pag-interpretar Niini. Busa sa diha nga ang Pulong Mismo; sa dihang gisaad sa Dios nga ipadala ang Mesias, ug gipadala Kini nga naputos sa mismong lampin nga gisaad Niyang magaabot Kini, aduna pud sila og lahi nga lampin aron pagaputoson Kini.

⁷³ Tugoti ko nga isulti kini. Mao man usab kini sa karon, nga dili nila Kini masabtan! Wala Kini diha sa lampin sa denominasyonismo o sa pagka-intelektuwal. Anaa Kini diha sa lampin sa gahum ug sa pagkabanhaw, ug sa kapadayagan sa nabanhaw nga Cristo, sa paagi mismo nga gikasaad sa Dios Kini, ug dili nga sa lampin sa mga hunahuna sa mga tawo mahatungod Niini.

⁷⁴ Karon, si Hagar, tungod sa usa ka diyutay’ng kalahian, pinaagi sa babaye, dili nga pinaagi ni Abraham ha. Dili gusto ni Abraham nga buhaton kadto, apan gitugotan ra siya sa Dios nga buhaton kadto tungod nga siya . . . Mao gihapon, gitugotan Niya si Balaam nga moadto. Karon himatikdi, tungod sa diyutay’ng pagtipas Niini, gipanganak niya si Ismael, nga usa ka salbahis nga tawo, nga wala gayud napaaghup sukad. Nagkinabuhi kini pinaagi sa iyang pana. Usa siya ka ihalas nga tawo. Mao ra gihapon siya, sa karon.

⁷⁵ Karon, si Sarah, ang uhay, o pollen, si Sarah, ang tinuod nga asawa sa gikasaaran, nanganak og usa ka maaghup nga lalaki, og ingon nga balus nagpabunga og usa ka gisaad nga nasud.

⁷⁶ Karon, nga, si Maria, walay pagpakighilawas, apan pinaagi sa usa ka saad, sama ni Abraham nga nakabaton sa saad gikan sa Dios, sa Pulong sa Dios, ug mitoo sa saad, “Ania karon ang ulipon sa Ginoo,” kita n’yo, nagpagawas dili nga usa ka lindog, kondili orihinal nga Binhi, tungod nga Siya man ang Pulong nga gitoohan ni Abraham ug nga gitoohan ni Maria.

⁷⁷ Karon, dili si Maria ang Binhi, siya’y tipaka lamang nga nagdala sa Binhi. Ang laing duha mao’y mga tigdala sa kinabuhi, sa natural nga binhi lamang. Dili si Maria mao ang Binhi, mismo; apan sama sa pagtoo sa Pulong sa Dios, naghatud og mas tinuod nga hulagway sa Pulong, tungod kay Siya man ang Pulong. Apan sama ra sa tipaka, sa . . . sa usa ka trigo, sa usa ka lugas sa trigo, ginahawiran sa tipaka ang trigo sa sulod niini ug ginaampingan kini hangtud nga mahimo na niini o gulang na nga puede nang mag-inusara sa kaugalingon niini. Kita n’yo? Dayon, ang Binhi na Mismo ang mihimulag kaniya. Sama ra, sa Binhi nga atua sa iyang tagoangkan, dili siya mao ang Binhi. Dili siya ang mihimo sa Binhi. Ang Dios mao ang Binhi.

⁷⁸ Karon, ang dugo kung ingon-niana, daghang mga tawo ang naghunahuna nga pinaagi kono kadto sa dugo sa Judeo nga nangaluwas kita. Ug miingon ang uban kanila, “Bueno, aduna kami’y katungod ingon nga mga Gentil, tungod kay si Rahab nga bigaon ug—ug si Ruth nga Moabitanhon, ug uban pa, sila’y mga Gentil man.” Wala gayud kamo’y katungod niana, ni usa. Dili Siya Judeo ni Gentil man.

⁷⁹ Siya’y Dios, ang Logos, ang Pulong nga migula gikan sa Dios. Sa dihang, misugod Kini nga maglumlom sa yuta, ug nagpagawas Kini og kinabuhi sa kadagatan. Sa diha nga ang Espiritu sa Dios, ang Logos, ang Pulong, nga miingon ang Dios, “Magkaaduna,” ug didto migula ang Logos, nga mao ang Pulong. Ug ang Pulong misugod nga . . . kay ang tanan niini anaa man sa Logos; ang tibuok nga Pulong sa Dios, ang tibuok Biblia, alang sa matag kapanahonan. Ug sa diha nga gisugdan sa Logos paginhawa ibabaw sa yuta, mitungha ang kinabuhi sa kadagatan; ug hangtud pataas, sa kinabuhi sa mga langgam, og hangtud na sa kinabuhi sa mga mananap. Ug sa katapusan dihay mitungha og butang nga nagarepresentar, o daw sa ginapatungha kini, nga nagalumlom sa ibabaw niini, ang Dios, usa ka tawo sa mismong hulagway sa Dios.

⁸⁰ Nahulog kadto nga tawo, sama sa binhi nga kinahanglan mahulog og malubong. Ug dayon misugod na usab ang Dios sa paglumlom, human sa maong pagkahulog. Nagpadala Siya og—og usa ka Enoch, nagpadala Siya og usa ka Elias, nagpadala Siya og usa ka Moises, nagpadala Siya og sunod-sunod nga mga

propeta, sa pagpaninguha nga ipasig-uli kadto nga hulagway pag-usab. Ug, sa katapusan, sa ibabaw sa yuta miabot pag-usab ang tinuod nga hulagway sa Dios Mismo, nga mao ang Dios, ang Logos nga nahimong unod ug nagpuyo ipon kanato.

⁸¹ Karon adunay bahin kanang mao ra nga Logos, aduna Siya'y usa ka Pangasaw-onon, ug ang mao gihapong Logos, kining Pulong nga dili puede mahilabtan, nagalumlom sa mga kaiglesiahan sa karon, nagapaninguha nga mahibalik pag-usab ang Pulong ngadto sa bug-os nga kapadayagan Niini. Nga, ang—ang mga propeta mao'y mga tigdala niana nga Binhi, ug ang mga iglesiang denominasyon nahimo pud nga mga tigdala sa maong Binhi karon. Karon himatikdi, sa gilayon, apan sama sa tipaka nga ginaputos, ginahawiran ang Binhi karon, unya mohimulag kini kaniya.

⁸² Si Jesus mao ang Dios. Siya gayud. Ang Iyang Amahan mao ang gamhanang Logos Mismo. Ug dili Niya Kini puedeng ibubo tanan kang Moises, tungod nga usa man siya ka propeta.

⁸³ Ug ang Pulong sa Ginoo sa kanunay, wala gayud nagakapakyas, nga nagaabot sa propeta. Walay dapit, walay panahon, diha sa Biblia, o sukad pa kaniadto sa Biblia, nga ang hustong interpretasyon sa Pulong nagaabot ngadto sa usa ka teologo. Wala gayud kini sa mga Kasulatan. Wala sa mga Fariseo, wala pud sa mga Saduceo, ug wala gayud nagpatindog ang Dios og usa ka propeta gikan kang kinsa man kanila, ug wala pud Niya kini gibuhat sa niining kaulahiing mga adlaw.

⁸⁴ Sa dihadiha nga gipatindog nila kini, nagkahiusa silang tanan ug nagtukod og usa ka organisasyon gikan niini, og dinha kini namatay. Apan gipahanugotan Niya kadto alang sa usa ka katuyoan. Paningkamotan natong isaysay kini, tabangan unta kita sa Dios. Himatikdi, tan-awa ninyo dinhi kung unsa siya ka halos magkapareho, ang iglesia, ang binhi ha, nga nahimong susamang tan-awon sa maong Binhi Mismo.

⁸⁵ Karon himatikdi ninyo, pag naipugas na ang binhi nganha sa yuta, kana'y orihinal nga binhi. Pagmogitib na kini, nagapatungha kini og kinabuhi. Apan unsa ma'y ginabuhat sa kinabuhi nga nagagikan sa usa ka binhi sa trigo? Wala niini ginapatungha dihadiha mismo ang mismong lindog sa trigo, o ang mismong lugas sa trigo. Kinabuhi kini mismo sa trigo, apan anaa pa kini sa hugna niini ingon nga tigdala. Ug mao kana ang unang repormasyon kaniadto, sa diha nga mitungha si Luther gikan sa kangitngit sa kagubot. Kinahanglan man gud una nga mamatay kadto.

⁸⁶ Sa makadaghang higayon, mouyon-uyon lang ang mga tawo. Oh, ug nakabasa ako og usa ka libro dili pa lang dugay, mahatungod sa, *The Silent God*, nga gisulat sa pipila niining modernong mga hanas sa pilosopiya nga naninguha lang nga ipasimang kamo gikan sa Dios. Kung wala kamo nahibalo sa

Pulong sa Dios ug sa plano sa Dios, mahimong dali ra kamo nga matay-og. Apan pagnakita ninyo ang plano sa Dios, ang Iyang programa, nan pinaagi sa pagtoo mahibaloan mo mismo nga iya kini sa Dios; ug ang Dios nga ginapaila ang Iyang Kaugalingon, nga ginabuhat lamang kung unsay gibuhat Niya kaniadto sa—sa uban pa nga mga kapanahonan, nagalakaw, nga nagapamatuod.

⁸⁷ Mao kana’y hinungdan nga wala gayud matay-og si Moises kaniadto. Nakigsulti siya nga nawong og nawong sa Dios, ug giingnan siya sa Dios, “Ako Mao ang kauban ni Abraham kaniadto didto. Ako Mao ang nagsaad niini nga saad. Ako magauban kanimo.” Unsaon man ninyo sa pagpahunong sa maong tawo kung ingon-niana?

⁸⁸ Maingon sa gisulti sa propeta kaniadto, “Sa diha nga ang leon mingulob na, kinsa’y dili mahadlok? Ug nagsulti na ang Dios, kinsa’y makahimo nga dili motagna?” Pagmakita nato ang mga butang nga gikasaad sa Dios niining panahona, makita kini nga gipadayag, unsaon man ninyo sa paghilom pagmakita na ninyo nga mao kana ang Iyang pamaagi? Kung unsa ma’y Iyang giingon, mahitabo gyud kana. Pag makita na ninyo ang tanan nga mga kahibulongang butang, apan eksaktong ingon niana gayud kana sa paagi nga pagkasulti sa Dios nga mahitabo kana.

⁸⁹ Karon himatikdi, “ang babaye,” ang tigdala. Karon, mitungha si Hagar ingon nga usa ka lindog, ug dayon mitungha ang pollen, ug dayon mitungha pud ang tipaka, ug dayon mitungha na ang Binhi. Karon tan-awa ninyo kini nga mga tigdala, gusto ko nga tan-awon ninyo, una.

⁹⁰ Karon, ang lindog dili gayud susamang tan-awon sa Binhi, apan ang Kinabuhi nga anaa sa Binhi anaa man sa lindog. Mao kadto si Luther. Karon, adunay daghang mga dahon ang gamay’ng lindog; migitib kini gikan kang Luther, paingon kang Zwingli, ug hangtud kang Calvin ug daghang uban pa.

⁹¹ Karon himatikdi ninyo, pagkahuman, nag-usab kini sa posisyon niini. Tan-awa ang kinaiyahan karon nga nagakaporma paingon sa Pulong sa Dios, sama sa adlaw; kamatayon, paglubong, ug pagkabanhaw. Dayon mitungha ang pollen, nga mao si Wesley kaniadto. Ug pinaagi niadto daghanang gagmay’ng mga pollen ang mipilit niadto, nga mas magkapareho na sa Binhi kay sa kung unsa ang dahon, sa trigo o sa mais. Mas magkapareho na ang itsura; tungod kay, si Wesley nga dala ang ikaduhang Pulong, ikaduhang Pulong sa Dios, gibayaw niya ang Iglesia sa Dios, og midangat kini sa pagkabalaan. Mao kadto ang iyang mensahe. Bueno.

⁹² Dayon, wala magdugay, nahulog kadto ug mibalik pag-usab sa lindog ug migawas ang usa ka pakaw sa mais. Apan sa wala pa migawas ang maong pakaw, aduna una ang pag-uyog, ang panit, ang putos, ang tipaka. Ug ang si kinsa man nga mag-uuma og trigo, mag-uuma og mais, kung susihon mo gayud ug

kuhaon kanang puso sa mais o kanang puso sa trigo, magdahum ka nga kanang gamay'ng—kanang unang gamay'ng butang mao na kanang lugas sa trigo. Ug, karon, mao kana ang kapanahonan sa Pentecostal. Karon dili mo mahimo, kamo, ang si kinsa man nga teologo o . . .

⁹³ Ang si kinsa man nga magsasaysay, diay, nasayod nga ingon-niana ang mga kapanahonan, ang paagi nga nagaabot sila. Tun-i ninyo ang—ang Basahon sa Pinadayag, tun-i ninyo ang mga kapanahonan sa iglesia, ug tan-awa kung dili ba ingon-niana ka eksakto nga nagakahitabo sila.

⁹⁴ Karon, gikan kang Wesley miabot ang Pilgrim Holiness, Nazarenes, ug tanan na nianang gagmay'ng holiness nga mga iglesia, nga mga mas haduol sa Pulong kay sa kung unsa ang repormasyon nga Lutheran kaniadto. Apan, nakita n'yo, sa dihang nag-organisa si Luther, mao kadto ang nagpasugod sa niining mga dahon. Ug sa diha nga ningtungha kini, gibiyaa sa Espiritu ug tibukol iglesiang Lutheran, ang tanan gawas lang sa mga denominasyonhon, ug ang tinuod nga mga magtotoo misulod ngadto sa pagpakabalaan.

⁹⁵ Ug pagkahuman nga mitipas na pud ang pagkabalaan, ang Pilgrim Holiness, ug uban pa, ug ang tanan nga mga organisasyong holiness, Nazarenes, ug uban pa, mibalhin Kini gikan didto, paingon mismo sa niining kapanahonan sa Pentecostal. Ug tan-awa kanang diyutay nga lugas karon, sa trigo, usa ka milyon na kini ka pilo nga labi pang magkapareho sa orihinal nga trigo, nga gilubong sa yuta, kay sa kung unsa ang lindog o kung unsa ang pollen. Apan kung molingkod kamo, ibutang kana ilalum sa usa ka lente, ug ablihan kanang gagmay nga mga tipaka, sila'y mga tigdala lang sa gihapon. Wala pa ang lugas midaku. Usa pa kana ka gamay kaayo nga udlot dinha mismo sa luyo, kung gamiton mo ang usa ka high-powered nga lente diin makita n'yo kanang gamay'ng tumoy, nga sama sa tumoy sa usa ka pukpok, dinha nagagitib pa lang ang binhi. Ug kining tipaka dinhi nga ang hitsura eksaktong kapareho gayud sa tinuod nga lugas, dili pa kini ang tinuod nga lugas. Kini'y usa lamang ka tagoangkan.

⁹⁶ Sama sa tagoangkan ni Maria. Dili si Maria ang maong Binhi, sa paghulagway dinhi sa lindog. Usa lamang siya ka tigdala Niini, sama sa uban pa niini. Apan ingon nga tinawag ug una nang gipili, sa Dios Mismo, alang niini nga katuyoan, daw sa mas pareho kini sama sa ginahunahuna sa atong mga higala nga Katoliko, nga siya kono ang inahan sa Dios. Dili, dili siya ang inahan sa Dios, dili usab siya ang Binhi sa Dios.

⁹⁷ Ang babaye ang nagahatag sa itlog. Ang Dios ang nagahatag sa—sa kinabuhi. Ang hemoglobin, ang dugo, ang maoy anaa sa lalaki.

⁹⁸ Mahimo man nga makapangitlog ang usa ka himongaan o mahimong makapangitlog ang langgam, og buhaton man ang pugaran niini sa panahon sa tingpamulak, apan, kung wala gikauban sa babaye nga langgam ang lalaki nga langgam, dili gayud kana mapiso. Patay kana. Mabugok ra kana diha mismo sa pugaran.

⁹⁹ Sama sa kanunay kong ginasulti, ingon-niana pud ang nagakahitabo sa mga kaiglesiahan sa karon, nagakabugok sila diha mismo sa pugaran, nga gitawag og Methodist, Baptist, mga Pentecostal, ug uban pa. Kung wala sila’y pagpakigtagbo sa Pulong, Mismo, mabugok gayud sila diha mismo sa maong pugaran, sa ilang organisasyon.

¹⁰⁰ Karon, karon ang uban kanila nagaingon, ang mga Protestante kapin kon kulang nagatoo nga si Maria kono ang naghatag sa itlog. Kung ingon niana man, tan-awa kung unsa ang ginapakita ninyo nga ginahimo sa Jehovah nga Dios. Dili baya mahimong ipagawas ang itlog nga walay sensasyon.

¹⁰¹ Busa, nakita n’yo, parehong gihimo sa Dios ang itlog ug ang semilya, gilalang Niya kining duha diha sa tagoangkan ni Maria. Ug kana nga Tawo walay lain kondili ang Dios Mismo nga nahimong unod ug nagpuyo ipon kanato, si Emmanuel, nga dili lamang usa ka buutan nga tawo, usa ka propeta; Siya’y usa ka buutan nga Tawo ug Propeta; dili nga usa ka magtutudlo, usa ka teologo. Oh, mahimo man Siya—mahimo man Siya nga ingon-nianang tanan; Siya man ang tanan-tanan. Apan labaw pa sa tanan niana, Siya ang Dios Mismo. Miingon ang Biblia, “Giluwas kita pinaagi sa Dugo sa Dios.” Ang Dios Mismo, dili nga ikatulong persona o ikaduhang persona. Ang Persona, nga Dios Mismo, ang gamhanang Jehovah, nga gilandongan si Maria; ug ang Magbubuhay, ug parehong gilalang ang selula sa dugo, ang kinabuhi, ug ang itlog usab.

¹⁰² Kung mahimo lang ninyo nga maipakita kana sa usa ka Judeo, kamo . . . nakaila man siya kung Kinsa ang Mesias. Sa diha nga naayo kadtong si John Rhyndidto sa Benton Harbor, nga buta sulod sa kuwarenta na ka tuig. Gipangutana ako niadtong rabbi, ingon siya, nagkaaduna ko’y pagpakighinabi kaniya, ingon siya, “Dili ninyo mahimong putol-putolon ang Dios sa tulo ka buok ug ihatag Siya ngadto sa usa ka Judeo.”

¹⁰³ Ingon ko, “Ang uban kanila ingon-niana man ang ginabuhay. Apan dili namo ginaputol-putol ang Dios sa tulo ka buok.” Ingon ko, “Nagatoo ka ba sa mga propeta?”

“Oo, nagatoo ako sa mga propeta,” ang giingon niya.

¹⁰⁴ Ingon ko, “Kinsa ba ang gihisgotan ni Isaias, sa Isaias 9:6, ‘alang kanato ang usa ka Bata natawo?’”

Ingon siya, “Aba, ang Mesias kadto.”

105 Ingon ko, “Unsa ma’y mahimong relasyon sa Mesias ngadto sa Dios?” Mao na kadto. Ingon ko karon. . .

Ingon siya, “Siya’y mamahimong Dios.”

106 Ingon ko, “Husto gayud. ‘Ang Iyang Ngalan pagatawgon nga Magtatambag, Prinsipe sa Pakigdait, Dios nga Makagagahum, Amahan nga Walay Katapusan.’”

107 Dinha kon diin napakyas ang mga oneness, dinha usab kon diin napakyas ang mga nagatoo sa trinidad, ang parehong bahin sa dalan. Apan ang maayo nga balanse maoy diha gayud mismo sa tunga-tunga. Kung ang Dios mao ang Kaugalingon Niyang Amahan, kung si Jesus mao ang Kaugalingon Niyang Amahan, dili Niya mamahimo kana. Ug kung aduna pud Siya’y uban pa nga Amahan gawas sa Dios, ug miingon ang Biblia nga ang “Espiritu Santo” maoy Iyang Amahan, ug kung sila’y duha ka managlahi nga mga espiritu, nan usa diay Siya ka ilehitimo nga bata. Husto kana. Kinsa ba ang Amahan Niya, ang Dios o ang Espiritu Santo? Ang sulti mo usa ra ug tan-awa kung dili ka ba kaha maulawan. Ang Dios mao’y Iyang Amahan. Husto ba kana? [Nagaingon ang kongregasyon, “Amen.”—Ed.]

108 Sa Mateo 1:18, miingon Siya.

Karon ang pagkatawo ni Jesus Cristo ingon niini: Sa . . . kaslonon pa ang iyang imahan nga si Maria kang Jose, sa wala pa sila managkatiayon, hingkaplagan siya nga nanamkon tungod sa Espiritu Santo.

109 Karon Kinsa ba gayud ang Iyang Amahan? Kita n’yo, kita n’yo na ang buut kong ipasabot? Himatikdi.

. . . si Jose nga iyang bana, sanglit tawo nga matarung. . . dili siya buot magapakaulaw kaniya, naghunahuna pagbiya kaniya sa tago, sa ingon niini.

Ania karon, sa nagapalandong siya niining mga butanga, . . . mipakita ngadto kaniya sa damgo ang usa ka manulonda sa Ginoo, nga nagaingon, Jose, anak ni David, ayaw kahadlok pagdawat sa imong . . . kang Maria nga imong asawa: kay ang gipanamkon niya iya sa . . . [Nagaingon ang kongregasyon, “. . . sa Espiritu Santo.”—Ed.]

110 Abi ko og ang ingon nila, “Ang Dios nga Amahan maoy Iyang Amahan”? Oh, mga teologo, asa na man ang inyong mga salabutan?

Himatikdi, “Sa panahon mismo sa kagabhion motungha ang Kahayag!”

111 Migawas ang tinuod nga Binhi gikan kang Maria, apan dili kini iyaha nga Binhi. Mao kadto ang saad sa Dios, nga miingon siya, “Ania karon ang ulipon sa Ginoo.” Ang mga kababayan-an mao gayud ang mga tigdala sa kinabuhi. Ug karon, si Maria, ang halos kapareho gayud sa Binhi.

¹¹² Kinahanglan nga dawaton kadto ni Hagar sa usa ka tinuis nga paagi. Si Sarah pud, nga nagaduhaduha sa maong butang, gipanganak kadto ingon nga usa lang ka natural nga binhi, sa pangibog sa pakighilawas. Apan si Maria, nga wala gayud og unsa man nga pakighilawas, mitoo sa Pulong, ug nahimong unod ang Pulong.

¹¹³ Apan himatikdi ninyo, si Maria ingon nga halos kapareho gayud, gipanamkon niya ang Binhi sa iyang tagoangkan, mao nga mora na gyud pud kadto og iyang Binhi. Ug mao usab ang mga Pentecostal. Paingon na ko sa akong punto. Apan hinumdumi, nga miingon si Jesus, diha sa Mateo sa ika-24 nga kapitulo, ika-24 nga bersekulo, “Sa kaulahiang mga adlaw, ang duha ka espiritu. . .” Dili sa nahaunang mga adlaw, ha. “Sa ulahing mga panahon, ang maong duha ka espiritu mamahimong halos magkapareho na gayud hangtud nga malimbongan niini ang mismong mga pinili kon mahimo pa.” Ang espiritung Pentecostal, nga eksaktong mora gayud og sama sa tinuod nga butang, halos hingpit ang pagkapareho nga malimbongan niini ang mismong mga pinili kon mahimo pa.

¹¹⁴ Karon, dili kana akong mga pulong. Mao kana’y Iyang gisulti. Karon, sa dili madugay, tingali’g makuha na ninyo ang pagsabot sa kung unsay gipaninguhaan kong isulti. Karon kadto nga Binhi sigurado gayud nga mas kapareho. . .

¹¹⁵ Kadtong tipaka mas kapareho gayud sa Binhi, hangtud nga labaw pa kay sa sa pollen, ug labaw pa kay sa kung unsa ang lindog, apan sila’y mga tigdala lamang sa Binhi. Kita n’yo, pagka-organisa ni Luther, namatay ang lindog; pagka-organisa pud ni Wesley, namatay ang pollen; pagka-organisa sa Pentecostal, namatay ang kinabuhi. Ug karon nagatungha ang Binhi. Wala ka na’y adtoan pa sunod sa Binhi.

¹¹⁶ Himatikdi, sulod sa daghang mga katuigan, sa diha nga motungha ang usa ka dakung kalihokan, dihadiha mismo pagkasunod niana nagaabot ang pag-organisa. Mga tulo ka tuig lang nagalungtad ang rebaybal, pagkahuman niana ginaorganisa na nila kini, magtukod og organisasyon. Dayon daghan nang mangtungha gikan niana; sama sa daghan nangtungha gikan kang Luther, mga dahon; ug daghan nangtungha gikan sa pollen, kang Wesley; ug Pentecostal nga mga dahon, oneness, twoness, threeness, fourness, fiveness. Oh, pagkaluoy! Kita n’yo?

¹¹⁷ Apan, himatikdi, sa baynte na ka tuig nga naipadayag si Jesus Cristo! Wala ni usa ka organisasyon ang mitungha, ug wala ni usa ang mahitabo; mamatay kini sama sa mga latter rain nga kalihokan, ug tanang uban pa. Kini na ang katapusan nga panahon, ang Binhi, ug dili kini mahimong manununod uban ang tipaka, pareho ra usab ni Ismael nga dili manununod uban ni Isaac.

118 Tan-awa ninyo dinhi kung unsa siya ka halos pareho na, parehong-pareho gayud aron makapanglimbong. Si Luther, ang lindog; si Wesley, ang uhay; ug si Maria, ang tipaka, o ang tagoangkan, o ang Pentecostal. Kung mahimo ko lang unta nga hisgotan pa kanang tipaka, ug ipakita kaninyo. Sa mga nangaging kapanahonan, wala gayud kini mitungha ingon nga halos parehong-pareho gayud hangtud nga sama sa kung unsa na kini karon. Ang tanan-tanan niini ang iglesia, ang *iglesia*, kita n'yo, ang "babaye."

119 Ug himatikdi, kadto mao ang "babaye," sa sinugdanan, ang nagduhaduha sa orihinal nga saad. Dili ang Dios ang mibawi sa Iyang Pulong. Wala ginabawi sa Dios ang Iyang Pulong sa karon; ginapanghimatud-an hinoon Niya ang Iyang orihinal nga Pulong! Apan miingon si Sarah, "Basin, tingali; nagahulat ra kami."

120 Ingon niana ang nagakahitabo sa mga tawo karong panahona, nagapaningkamot kamo nga mokatkat sa usa ka butang nga wala gani kamo mahibalo kung unsay inyong ginakatkat. Unsaon man ninyo sa pagbuhat niana gawas kon nahibalo kamo kung unsay inyong ginabuhat? Nagalakaw ba mo nga nataptapan? Ang pagpaningkamot sa pagkatkat sa usa ka butang nga wala kamo mahibalo sa kung unsa ma'y ginabuhat ninyo, mahulog gayud kamo. "Kung ang buta magagak sa buta, pareho silang mangahulog diha sa gahong," si Jesus ang nagsulti niana.

121 Apan karon nagatindog kita sa panahon sa Binhi. Karon ang Binhi magapabilin, (unsa?) mosuporta, makigtimbayayong sa Binhi nga nagagunit Niini. Gipahimutang Kini dinha alang niana nga katuyoan, aron gunitan kana.

122 Tungod kay, sama sa adlaw nga nagasubang sa pagsugod sa tingpamulak, sa trigo, tan-awa ang tibuok kinaiyahan sa kinatibuk-an nianang panahona, sa tibuok pagtuyok sa adlaw, ang tanan-tanan nagatuyok sa ingon gayud ka eksakto, diha sa Dios. Karon pag mosugod nang mosidlak ang mainit nga adlaw nganha sa binhi, mogitib kini. Apan ang kalibutan kinahanglan gayud nga maanaa sa usa ka siguradong pagkabutang aron mahimong mogitib kana nga Binhi gikan sa yuta. Kinahanglan nga mosubang kini sa ingon niini nga direksyon, ug mapahimutang sa pihong puwesto aron moturok kana nga binhi. Kinahanglan motungha kana sa ingon-niana nga paagi, aron mapausbong kana gikan sa . . . sa mangiub nga kapanahonan.

123 Ang ubang mga tawo . . . kining kritiko nga giingon kong misulat sa libro, *A Silent God*, ang ingon niya, "Sa kinatibuk-an niadtong mangiub nga kapanahonan, nangamatay kadtong makaluluoy nga mga martir, nangamatay sila, kadto nga mga Cristohanon, ug ang Dios nagalingkod ra sa Langit

ingon nga mora'g wala man lang Siya'y labot." Aba, ang maong makaluluoy'ng walay-kahibalo, buta, tawong buta sa espirituwal, kung nakabuka lang unta ang iyang mga mata! Wala ba mo mahibalo nga kinahanglan malubong ang binhi diha sa yuta, aron mamatay ug aron madugta, sa dili pa kini mahimong moturok pag-usab?

¹²⁴ Ug namatay kaniadto ang iglesia sa pentecostes, tungod sa unang iglesiang Katoliko. Ug migitib kini diha sa porma sa usa ka lindog, apan nakita n'yo ba kung unsa nga hinayhinay kini nagakaporma, sa matag kapanahonan, niadtong Lutheran, Wesley, Pentecostal nga kapanahonan? Nasabtan ba ninyo? [Nagaingon ang kongregasyon, "Amen."—Ed.]

¹²⁵ Karon kinahanglan mobalik Kini mismo ngadto nianang orihinal nga ministerio nga nagkaaduna Siya dinhi sa yuta kaniadto, 'kay ang Pangasaw-onon kini. Usa ra sila. Karon nagsaad Siya, nga sa kaulahiang mga adlaw, kung unsa nga kining mga butang magakahitabo. Ug makita nato nga nagakahitabo na kini, sama sa niining tanan nga mga saad, Malaquias 4, San Lucas 17:30. Oh, pagkadaghan pa nga mga Kasulatan, mahimong dili nato matapos!

¹²⁶ Ug, oh, kinahanglan ko nang moundang, 'kay udto na. Oo. Bueno, imong—imong ingnon sila, tan-awa kung mahimo ba nilang. . . Hangyoa sa sila, kita n'yo, ug pagkahuman balik ka og sultihi ko. Karon, kadali na lang. Gusto ko gayud nga maipasabot kini, og ayo, kita n'yo. Ako—gusto kong masabtan ninyo kini, og ayo. Tan-awa, si Jesus. . . Himatikdi, kita n'yo, ang Pangasaw-onon.

¹²⁷ Gani, nahibaloan nato, sa niining kapanahonan nga atong gikapuy-an karon, kita n'yo, nga ang tagoangkan, ang Pentecostal nga organisasyon, eksaktong mora gayud og sama sa tinuod nga butang. Apan nahunahuna n'yo ba nga, ang Pinadayag 17, gitawag niini ang iglesiang Romano Katoliko, ang unang organisasyon, nga usa ka "bigaon"? Pila man ang nakahibalo nga tinuod kana? Pila man ang nakahibalo nga siya mao ang inahan sa mga bigaon? Unsa man ang imoral nga babaye? Karon, miingon ang Dios nga kini nga babaye "iglesia." Unsa man ang bigaon? Usa ka babaye nga dili-matinuuron sa iyang saad sa kaminyoon. Unsa man ang usa ka babayeng bigaon? Mao gihapon, mao ra nga pulong.

¹²⁸ Karon, nanganak siya. Unsa man nga matang sa pagpanganak? Dili sa Pulong, kondili sa organisasyon nga pagpanganak. Ania ang Methodist, Baptist, ug mga Pentecostal, ug nabatonan nilang tanan ang mga gawi sa ilang inahan. Ang si kinsa mang dautan nga babaye sa California makapanganak og usa ka ulay nga batang babaye; ug mao kana kon nganong miabot ang unang mensahe, apan sa diha nga gipresentar ang kamatuoran ngadto sa kapanahonan ni Luther, mahatungod sa

pagpakabalaan, dili niya kini madawat. Sa diha nga gikatugot ang Espiritu Santo, gipresentar nganha sa mga Methodist, dili nila kini madawat. Ug karon sa diha nga namunga ang kapanahonan sa Binhi og usa ka pentecostes, dili niya Kini madawat. Organizado na siya. Apan nahimo siyang usa ka tigdala sa Binhi kaniadto pa, kita n'yo.

¹²⁹ [Usa ka igsoong lalaki ang nagasulti og laing mga dila. Blangko nga bahin sa teyp—Ed.] Amen. Karon salamat sa Ginoo alang niana, ang Pulong, ang kayano gayud sa Pulong nga gisulti.

¹³⁰ Kita n'yo, yano ra gayud kini, nga sama lang niini, sama ra pud sa pagtan-aw sa mais nga nagatubo. Dili mo na kinahanglan pa nga magkaaduna og usa ka dakung teolohikanhong interpretasyon niini. Tan-awa lang kini. Inyong . . . Siya'y anaa diha sa inyong palibot mismo, sa tanang panahon. Kita n'yo, ang . . . usa kini . . .

¹³¹ Kinahanglan ko na gayud nga moundang. Nabati ko na ang diyutay'ng pagkuhit, ug gihangyo ko siya nga buhaton kana. Kinahanglan na natong humanon. Karon, igsoon, kini na lang usa ka pahayag, dayon molakaw na ko.

¹³² Tan-awa, karon. Ang tipaka, ang lindog, ug uban pa, maoy mga tigdala lamang sa Pulong. Aduna sila og bahin sa Pulong, kita n'yo, hangtud nga midangat sila; sa pagpakamatarung, pagpakabalaan, pagpasig-uli sa mga gasa diha sa—sa mga Pentecostal. Apan karon himatikdi. Maingon kaniadto kang Ismael, Isaac, kita n'yo, ug dayon kang Jesus; kita n'yo, ang usa maoy tinuis, ang usa pud mao ang orihinal, ug ania nagaabot ang Binhi Mismo. Kita n'yo? Karon, naggikan ang iglesia sa nianang mao ra nga butang, dinha mismo. Sama sa usa ka bulak o unsa pa man, nagainom kini, nagapamunga, ug padayon nga . . .

¹³³ Dili kana nagapasabot nga alaut ang Lutheran. Ang Lutheran nga misalikway sa pagpakabalaan, siguro, nga gustong manggunit sa usa ka butang. . . Kita n'yo, nagakaon kaniadto ang Israel og bag-ong manna sa matag gabii, kita n'yo. Himatikdi.

¹³⁴ Apan karon sa katapusang panahon, tan-awa kining tipaka dinhi, karon himatikdi, diha sa trigo. Ang tibuok misteryo sa—sa Kinabuhi giselyohan dinha sa sulod nianang tipaka. Nakita nato kini kang Luther, nga migitib. Nakita nato kini diha sa uhay, nga mitubo. Nakita nato kini diha sa lindog. Miabot kita dinhi dapit, ug karon anaa kini sa tipaka nga porma, nga halos magkapareho sa pentecostal nga kapanahonan, apan ang tinuod gayud nga misteryo nakatago ra sa sulod.

¹³⁵ Karon hinumdumi, sumala sa Pinadayag, nga ang tibuok misteryo sa maong Basahon naselyohan og Pito ka Mga Selyo, nga ang mga repormador kaniadto wala gayud og kahigayonan nga maipadayag, ang upat ka hugna sa pagreporma, ang upat

ka hugna sa upat ka mga Mananap nga migawas aron tagboon ang upat ka gahum sa kalibutan. Ang una nga migawas, mao ang usa ka . . .

¹³⁶ Unsa man ang unang migawas? Usa ka leon, aron atubangon ang Romanhon nga kapanahonan. Mao kadto ang Pulong, ang orihinal. Siya ang Leon sa banay ni Juda. Si Cristo Mismo ang migawas aron tagboon kadto nga kapanahonan. Unsa man ang sunod nga mananap nga migawas aron motagbo; ang sunod nga mananap nga migawas, aron atubangon ang usa pa ka mangangabayo, unsa man siya? Kita n'yo, kadtong una nga mangangabayo nakabisti og puti, gipurongpurongan ang iyang ulo, pagkahuman, og uban pa, may usa ka pana pero walay mga udyong.

¹³⁷ Himatikdi ang ikaduhang kabayo nga mitungha, ang Mananap nga mitungha aron tagboon siya maoy usa ka baka. Ang baka usa ka mananap nga panghalad. Nangamatay sila ingon nga mga martir sa panahon sa mangiub nga kapanahonan.

¹³⁸ Ang ikatulo nga Mananap nga mitungha aron tagboon ang sunod nga kabayo, sa wala pa ang mangangabayo sa kamatayon, kamatayon ug impiyerno, ang sunod nga kabayo nga mitungha. . . Ang sunod nga Mananap nga mitungha aron atubangon ang mangangabayo niadto nga panahon, mao ang Mananap nga adunay dagway sa tawo. Pila man ang nakahibalo niana? Ang intelektuwal nga kapanahonan, ang mga repormador, nga si Luther, Wesley, Calvin, Knox, Finney, og si Moody. Kita n'yo?

¹³⁹ Apan pagkahuman himatikdi, unsa man ang mitungha sa panahon sa kagabhion? [Nagaingon ang usa ka igsoong lalaki, "Agila!"—Ed.] Usa ka agila, mibalik pag-usab ang propeta. Motungha ang Kahayag sa panahon sa agila, ang dalan sa Himaya inyo gayud mahikaplagan, Oh Iglesia sa buhi nga Dios!


¹⁴⁰ Gusto ko unta nga moanhi dinhi ug—ug molingkod lang sa usa ka buntag, ug magpabilin sa tibuok adlaw, makipag-fellowship kaninyo mahitungod niini nga mga butang. Paminaw, nagahunahuna ba kamo nga dili ko kamo gusto? Gihigugma ko kamo, mga igsoon ko. Ako—ako—gusto ko gayud nga moadto sa matag organisasyon ug makigtim-. . . ug—ug motoo lang sa matag usa. Apan, nakita n'yo, dili gayud kana mamahimo. Halos wala na'y pultahan nga abli para kanako.

¹⁴¹ Mosulod ako sa usa ka nasud karon nga walay pagpahibalo, tungod sa organisasyon, tungod kay dili man nila tugotan ang ministerio sa Dios nga. . . gipadalhan ko sila og sulat sa pagtubag, ingon ko, "Sulod sa napulo ka tuig gipaningkamotan kong mosulod. Ug kamo sa inyong binuang nga bautismo!"

¹⁴² Nagatoo ang usa kanila, "Kinahanglan mong mabautismohan sa makatulo ka higayon; sa makausa para sa Amahan, ug sa makausa para sa Anak, ug Espiritu Santo; nga

pinaatubang.” Ang ingon sa usa pa, “Dili, kinahanglan mong mabautismohan sa makatulo ka higayon nga pinahayang; sa makausa para sa Anak, sa makausa para sa Amahan, ug Espiritu Santo.” Ug pareho silang sayup.

¹⁴³ May usa pud nga miingon, “Siya, nabautismohan ka sa Iyang kamatayon, ug midungo Siya pagkamatay na Niya. Nabautismohan kita sa Iyang kamatayon.” Ang ingon sa usa pa, “Kinsa ba diay ang nagalubong sa usa ka tawo nga pinakulob? Ginalubong mo gayud kini, nga pinahayang.” Ingon niana nga mga binuang, nga nagapahimulag sa mga tawo, ginapakita ra niini ang kasina. Iya kini ni Satanas. Dili kini iya sa Dios.

¹⁴⁴ Sa taliwala niadtong matag bahin, wala gayud ang Dios bisan hain niini nga bahin, kondili nagatawag Siya sa maong matag bahin, “Panggula kamo gikan kanila, ug magpalain kamo,” ang ingon sa Dios, “ug pagadawaton Ko kamo sa Akong Kaugalingon.” Panalanginan kamo sa Dios. 

ANG BINHI DILI MAHIMONG MANUNUNOD
NGA UBAN ANG TIPAKA CEB65-0429B
(The Seed Shall Not Be Heir With The Shuck)

Kining Mensahe ni Igsoong William Marrion Branham, unang giwali sa Ingles niadtong Huwebes sa buntag, Abril 29, 1965, para sa pang-pamahaw nga tigum sa Full Gospel Business Men's Fellowship International didto sa Biltmore Hotel sa Los Angeles, California, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org